

四庫全書

集部

欽定四庫全書

集部

青陽集

目錄
卷一

詳校官編修_臣翟槐

中書_臣劉源溥覆勘

總校官進士_臣繆琪

校對官中書_臣李斯咏

謄錄監生_臣王鍾岱

欽定四庫全書

集部五

青陽集

別集類四元

提要

臣等謹案青陽集四卷元余闕撰闕字廷心

一字天心色目人世居武威以父官合肥遂

家焉元統元年進士累官淮南行省左丞分

守安慶陳友諒陷城自剄死贈行省平章謚

忠宣事跡具元史本傳闕以文學致身于五

經皆有傳註篆隸亦精緻可傳而力障東南
與許遠張巡後先爭烈故集中所著皆有闕
當世安危其上賀丞相四書言斬黃禦寇之
策尤為深切使闕計果行則友諒之能陷江
東西否尚未可知也其第二書謂往時秦哈

布哈

原作秦不
華今改正

曼濟哈雅

原作蠻子海
牙今改正

并力

攻斬黃賊幾就滅忽撒散各軍止有布延特

穆爾

原作卜顏帖
木兒今改正

駐劄蘭溪盜之復陷沿江

諸郡實人謀不臧證以布延特穆爾本傳知

丞相托克托

原作脫脫今改正

雖有功于江淮而實

階亂于蘄黃之地又第四書曰蘭溪之功布

延特穆爾平章為最曼濟哈雅中丞特因之

成事布延特穆爾傳亦采用之則又是非之

公足以信諸後代者也其詩以漢魏為宗優

柔沈涵于元人中別為一格胡儼雜說曰初

危太樸以文學徵起士君子皆想望其風采

或問虞文靖公曰太樸事業當何如曰太樸入京之後其詞多誇事業非所敢知必求其人其余闕乎問何以知之曰集於闕文字見之後闕竟以忠義顯乃知前輩觀人自有定鑒云云然則文章雖闕之餘事而心聲所發識度自殊矣乾隆四十六年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

集部五

青陽集目錄

別集類四
元

卷一

詩

卷二

序

卷三

記

卷四

碑銘 墓表

卷五

策書

卷六

雜著

欽定四庫全書

青陽集卷一

元 余闕 撰

詩

擬古

昔在西京日縱觀
質前聞皇皇九衢裏
列第起朱門借問誰所居
丞相大將軍平明事遊謁
車馬若雲屯芍藥調羹鼎
狝狝鑄酒尊頌聲美東魯
逸奏出西秦迴風薄

蘭氣十里揚清芬東家有狂生容顏若中人
謬言擬宣聖幽思切玄文著書空自苦名官
乃不振悠悠千載下
安有揚子雲

又

昊天轉時律大火西南馳勁商發羣籟白
露降嚴威攬衣起視夜明月鑿薄帷翩翩
征雁翔唧唧寒蛩悲紅蘭委芳采柏葉亦
離披喬喬千丈松孤生泰山隈凝霜裂其
膚層冰斷其柢摧殘若傾蓋蒼翠終不移
草木有至

性明哲宜戒之

白馬誰家子

白馬誰家子綠轡縵胡纓腰間雙寶劍璀璨雪花明甫
出金華省還過五鳳城君王賜顏色七寶奉威聲夜入
瓊樓飲金樽滿繡楹燕姬陳屢舞楚女奏鳴箏慷慨顧
賓從英風四座生一朝富貴盡不如秋草榮黔婁固貧
賤千載有餘名

擬古

贈楊沛

楊生仕州縣謀國不謀身一朝解印綬歸來但長貧茅
茨上穿漏頽垣翳綠榛空牀積風雨蝸牛止其中辛苦
豈足念殺身且成仁

天門山

保寧知府楊母梓人作記

楊子博地志名山屢出王但言隱彌匿崇冠峙嵩梁井
絡通遙向天經列鉅障羣峰如菡萏壁亂發金塘玉壺
既嶮嶠天門迫開張宛虹連紫蓋丹泉濺石床入門陰
脩竹中夏若寒霜靈鳥多異色中林皆妙香耀真啓幽

室積石構瑤房萬里秘冥奧千秋阻秩望淮應學仙侶
結桂共相羊

送劉伯溫之江西廉使

得雲字

祖帳依山館車蓋何繽紛使君驅駟馬衣上繡成文中
坐陳綺席羽觴流薄薰情多酒行急急歌吹殷况我
同鄉友同館復離羣初暘麗神臯遙望澄遠氛迴鑣望
雙闕五色若卿雲蒼茫歲年徂東西岐路分道長會日
遠何以奉殷勤惟有凌霜柏天寒可贈君

送李好古之南臺御史

都門相送處旭日動蘭暉綺樹鶯初下金溝絮漸飛分
驂向遠道把袂戀音徽去去江南陌應看滿路威

送普原理之南臺御史兼東察士安

霜暑起南天雲霄畫榜懸兩幃猶可對二妙古難全夏
木籠雕檻風華度繡筵時應聯騎出誰謂非神仙

送霍維肅令尹

握手蘭宮外朝光滿徑塗山寒知塞近苑靜覺鶯疎草

草離樽既悠悠征輛驅還應軫時念不羨報金吾

秋興亭

涉江登危榭引望二川流
雙城共臨水兩岸起飛樓
漢渚深初綠江臯迴易秋
金風揚素浪丹霞麗綵舟
登高及佳日能賦命良儔
御者奉旨酒庖人供膳羞
一為山水媚能令車騎留
為語同懷者有暇即來遊

安南王留宴

將命坐藩服式禮奉國賓
賢王重意氣延客到華廂
肅

肅高堂上圓方饋八珍齊優雜趙女歌曲一何新遺響
從風發雕梁落素塵中觴每傳滿眷眷難具陳厚往已
有愧懷報恐無因

九日鄂渚登高

南州理秋被嘉節協乾陽爰與幕中友臨眺陟崇岡維
時天氣肅芬菊已沾霜雷雷風振谷淒淒日在房高雲
斂楚岫曜景遊川漲微徑出丹林列坐泛金觴佳賓未
易合良會安可常英曹幸文推獻酬寧計行預恐還吹

帽煩君戒太康

呂公亭

鄂渚江漢會茲亭宅其幽我來窺石鏡兼得眺芳洲
遠岫雲中沒春江雨外流何如乘白鶴吹笛過南樓

詠井上桃花

本是仙源種移來禁中栽為愛妖嬈色偏臨露井開

先天觀

仙客鍊金地蒼山深幾重至今龍虎氣猶在琵琶峰

前石路整金澗垂楊嶺萬壑闕阿宮千年奉丹鼎日日
采三秀人人吹玉笙既要王子晉復命董雙成方朔金
門步春來多自豫青鳥幾時還銜書寄君去北闕懷美
祿南山思遠遊勞心如御水東去復西流

黃鶴樓

嶕峣黃鶴嶺歸巍構楚材澄江還畫楫連城抗鉛階雕
衡朱鳥峙淵井綠荷開隱見長沙渚想望陽雲臺晴霄
一仰止輪奐信美哉淮南儻好道日夕化人來

別樊時中

桃花灼灼柳絲柔
立馬看君發鄂州
慎惱人生是離別
不如江漢共東流

宴晴江山拱北樓

漢坻開繡閣
蕭然似渚宮
晴江華楫外
列岫綺錢中
樹色青罇綠
荷花女臉紅
賢王敬愛客
樂宴意何終

山亭會琴圖

連山環絕壑
雲木亂紛披
中有抱琴者
有如榮啓期
蕭

然久不去問子欲何為

絕塵軒

網軒開翠嶠山水下葱蘢江中寶牀擁樹杪畫欄紅心
融二障滅境靜六塵空應似青蓮葉齊開綠水中

壓雪軒

軒轅鑄鼎處仙臺成畫圖寒雲生洞渚暝色入蒼梧如
霧飄丹閣非烟起玉爐年年漫來此無處挽龍胡

大別山柏樹

奇樹如蛟蜃盤飀上虛空孤生雖異桂半死反如桐香
帶金爐氣色映綺錢中靈從后皇服年隨天地終常瞻
北枝翠終古鬱葱葱

竹嶼

秋水鏡臺隍孤洲入淼茫地如方丈好山接會稽長紫
蔓林中合紅蓮葉底香何人酒船裏似是賀知章

題虞邵菴送別圖

南州山水麗中田歲事豐時貞文物聚道合朋輩同濟

濟衆君子班坐蔭青松迴洲環偃月丹林結綵虹翔鷗
方矯矯鳴雁亦嗷嗷即趣情已展染翰思彌工予亦幽
棲者纓冠朝北宮披圖誦佳詠邈爾想高風

送危應奉分院上京

峽路傳清警金輿夾綵旃還如向姑射詎比幸甘泉苑
樹紛成幄關榆始委錢從臣偏寵近載筆慢城邊

題段應奉山水圖二首

水如剡溪水山似剡溪山想見鱸魚美扁舟常不還

花隱玉堂署曲几對雲峰為問江南客何如九里松

嘉樹軒

為胡士恭作

嘉植將百歲積翠廣庭間高柯出閭巷低枝蔭井幹流
膏從風颺芳氣散如蘭別有清霜節將同綺樹看

鶴齋

為薛茂弘道士賦

葉縣飛鳧鳥琴高駕赤鱗豈若青田鶴蕭灑迺仙倫刷
羽琪樹側振吸華池津騫騰望霄漢逸氣已冲辰鍊液
諒有驗滅景入無垠還乘過緱嶺舉手謝鄉人

禎祥菊

為實刺卜院使賦

舊花已萎絕新花迺再芳
都緣稟金氣特解做司藏
旖旎生殘馥葳蕤出故房
應憐蕙草質戢穎委微霜

賦得九里松送吳元振之江浙左丞

結駟向青郊松陰九里遙
言從天竺寺自度小春橋
偃蹇成芝蓋蕭瑟蔭蘭橈
相送將何贈期君保後彫

龍丘長吟贈程子正

戰龍起新室羣鳥亦翩翩
偉哉龍丘生抱琴歸故山
仰

視天際鴻俯弄席上絃清音發疏越逸響遺澗泉悠悠
鳳翔漢婉婉虬媚川清風自千古何用能草玄

送觀至能赴歸德知府

善理崇富教長郡等烹鮮况茲久彫瘵望治切宸淵紆
組承明裏結駟雙闕前燕郊芳草歇商墟大火懸高懷
薄霄漢攬轡殊慨然揆予昧時用載索從甘泉庶聞兩
岐詠為予書汗篇

送黃紹及第歸江西

上林華落盡東門餞別初遊絲橫輦道金波溢鏤渠含
觴不能飲躑躅此城隅念子正英妙丹泉媚綠蕖翻然
阻山岫邈爾問離居芸閣誰同坐蒲生孰共書時應有
詞賦為寄北飛魚

送胥式南還

孟冬寒律應原野降繁霜客子倦遊覽結筇還故鄉驅
車出城闕旭日懸晶光綺宮上爛爛翠閣後蒼蒼豈無
京華志晞景發清揚富貴在榮遇貧賤有安行恒恐歲

年迫臯蘭凋紫芳君看沙上雁騫翮乃隨陽

題果羅羅易之四明山水圖

窓中望蒼翠春木起晨霏孤嶂纔盈尺長松未合圍蕭蕭此仙客日日候岩扉念爾空延佇王孫且未歸

題黃河清艮岑幽居

大明照四海之子乃陸沈遠絕仁義絆結宇幽藪陰蒼翳谷中路蘄崩北山岑窓鸞響初蔭隴月頽夕林時憑曲水几蕭散發長吟委化諒為達滯樂恐遂淫援琴鼓

招隱念子為薰心

題施氏西嶼書堂

中智得貴性得性非易求羨君潁水曲松竹蔽層丘春
秋當佳日兄弟各命儔摠轡凌晨術展席面綠流參差
瓊峰出泓澄綺磧周細荷承繡宇黃鳥響疏樓起坐玩
芳帙為樂鮮優游河陽恥巧宦建春厭旅愁安得周公
瑾為館孫仲謀

送方以愚之嘉興推官

帝仁同禹泣典憲輟朝纓我友膺時選銜命出承明是
日芳節屈列餞多鉅卿桃花疑組色烏囀雜歌聲仰獻
一杯酒遠慰千里行丈夫有遠業文墨非所營勉布惟
良政持用答皇情

玉雪坡

為周伯溫賦

江梅有至性能怡君子顏開花競芳節擢秀帶春寒惟
與玉同色還嗙雪易殘芳香拂羅袖如薰金博山置此
賓席上人人別意看

題劉氏聽雪樓

羣峰擁臨檻脩竹鬱菁菁蔭向曲池好聲惟雪夜清天
寒三日臥人道是袁生

題光祿主事虎仲桓海棠圖

沈香羯鼓打春寒纔見開時又見闌爭似君家屏幃裏
年年歲歲有花看

送王其用隨州省親

都門楊柳萬絲垂城下行人駟牡駢宮中近得三年謁

篋裏新裁五色衣
漢臯秋晚遊娼少
夢渚波寒獵火微
我有愁心似征雁
隨君日日向南飛

題果囉羅易之鄞江送別圖

欲去更還顧
依依戀所知
今朝去京日
似子渡江時

宋顯夫學士輓詩

紫陌暗蒼茫
松門近太行
悲笳翼蜃軸
素紱引魚荒
故筆誰探取
神書永共藏
愁尋持索地
秋陰結女牀

馬伯庸中丞哀詩

結纓超魏闕俛仰二十霜化運易遷逝故老今盡亡維
時遊公門時節會高堂崢嶸奉餘論炫燿希報章制若
縵繡陳聲若寶瑟張儀若龍文鼎爛若照夜璫羊眠出
工巧幻妙極豪芒抽思究皇術振藻詠時康是時朝廷
上才彥羣有望公如逸虬出萬驥為留行念此今已矣
松柏杳茫茫驅車入珂里穹門委舊衡珠移青淵涸桃
盡故蹊荒龍火出勁秋玉衡變春陽朝榮計已殞夕香
豈不芳感彼推輪始惻惻我心傷

祝蕃遠經歷艱詩

逸軌無還轍驚川有怨思
蒼苔生舊館素簡委空帷
龔勝誰相弔虞翻少見知
惟應問道者廬墓薦江蘼

題紅梅翠竹圖

竹葉梅花一色春
盈盈翠鈿掩丹脣
休言畫史無情思
却勝宮中剪綵人

題蛾眉亭

空亭瞰牛渚高高凌紫氛
澄江萬里至華嶠兩眉分
落

日兼霞綵流光成綺紋憑軒引蘭酌休憶謝將軍

南山贈隱者

君家南山下南山果何如
開如陣雲黑向背凌空虛
木客采薜荔怨女詠薜蘿
蕪何當牽白犬見君巖下書

賦得慈恩寺塔送李惟中赴西臺侍御

祇園開塔廟遐瞰盡三秦
瑠玉裁文陛金銅結綺輪
高標雙闕外流影灞陵津
攬轡還登眺題名繼昔人

蘭亭

奉節過東鄙，搃轡臨越墟。覽此崇山阿，亭樹猶晉餘。
陽林積珍木，禊館疏樓渠。微風旋輕瀨，宛委寫成書。
秋杪霜露滋，清商滿縣隅。紅蓮彫綺蕊，微瀾見躍魚。
藉芳泛羽觴，視聽良有娛。逍遙大化內，豈必三月初。

汪尚書夫人輓詩

喧喧引長絃，簫鳴閭井間。旌連綺霞閣，路指敬亭山。
泉底鸞臺掩，城中翟蓋還。尚書老歸國，誰與襲芳蘭。

贈澄上人

瓊色衣裳護七條手持經卷意蕭蕭
頭陀寺裏相逢後又向天台訪石橋

贈山中道士善琴

山中道士綠荷衣新抱瑤琴出翠微
已與塵緣斷來往逢人猶鼓雉朝飛

題紅葵蛺蝶圖

蛺蝶既無數秋花亦滿枝
終焉不飛去似怨弄芳遲

自集賢嶺入大龍山

皖公標楚甸茲嶺孕奇形翠積縱江潁崇冠呂蒙城戒
途入中林平岡駐我旌延望失來術周覽多所經我
石窓矗窅窅巖岫冥離離雲朝濟粲粲樹敷榮關弓射
鳴雁羣谷振絃聲仰憐山人居俯悅洞下耕蒼龍啓春
候金虎收光精權家既非學農用或可明顧言同載者
為爾鑄阿兵

安慶郡庠後亭讌董僉事

亭名天開圖畫

鯨鯢起襄漢郡邑盡燒殘茲城獨完好使者一開顏省

風降文囿弭節遵曲干雙池夾行徑累榭在雲間天淨
羣峰出地迴蒼江環霞生射蛟臺雁沒逢龍山開樽華
堂上命酌頻危闌主人送瑤爵但云嘉會難豈為杯酒
謹樂此罷民安魄淵無恒彩清川有急瀾明晨起驂服
相望阻重關

題周伯寧畫

殺機起無象平陸忽成紅蒼生既猛虎日馭經紛虹舉
目墟里間但見蒿與蓬惟有王官谷于今似畫中

九日宴盛唐門

今日良宴集玉帳設金縣賓稱此嘉辰令德應重乾淒
淒秋陽升湛湛江景鮮西馳三涇津東瞻九華山文湍
帶粉堞卿雲覆綵旃清歌送銀爵泛此秋花妍嗟予遠
征人別家今四年采薇夜歸戍操築朝治垣微此一日
歡苦辛良可憐中腸感前謀撫運當泰年燭柴盛唐郡
泛舟縱江前臨川射長蛟雄風推八埏豎儒繆從役任
重力迺綿武功既無成文德何由宣微勲倘有濟敢愧

魯仲連

登太平寺次韻董憲副

蕭寺行春望下方城中雲物變淒涼野人籬落通瀟口
賈客帆檣出漢陽多難漸平堪對酒一樽未盡更焚香
憑將使者陽春曲消盡征人鬢上霜

三月廿九日郡庠後亭燕廬啓先僉事

晨集疑江渚列席當蕙揚斯亭信顯敞翠嶺帶澄川潮
駕宜城步山積司空原青松紛被徑紅桃競發園衆賓

起為壽繁轉出嬌絃中觴念遠離歲行已再遷漂萍有
時合浮雲未見旋今朝不為樂來會知何年

寄題環秀亭

五祖寺

宗老來相報黃梅盜已平傳聞一峯下還有九江橫象
構誰能壞香臺積可成憑詢幾小劫又復到昆明

題溪樓

溪水綠悠悠高樓在溪上日暮望江南舟中采菱唱

奉和旨南上人喜雨之什叔良雖不作詩不妨

一觀也

出車橫門道采薇皖溪水雜耕不逢年軍士常飢餒奉
牲走羣望悃迫忘汝爾皇皇大司命配天奠南紀方屯
啓時澤極民出瀕死雲章變膚寸雨勢來不已睇嶺三
峯深行阡九江起開房各葦葦擢葉方沉沉說郊君壯
駢盭野田暖喜未論車箱滿已見沽酒旨斯民既云樂
兵甲行可洗赫靈有耿祉壽夭誠在已淫陰無往轍薄
伐有凶理撫事非偶然涼薄那致此騁辭繼周頌屢豐

自天子

送康上人往三城

嘗登大龍嶺橫觀視四方原野何蕭條白骨紛交橫維
昔休明日茲城冠荆揚芳郊列華屋文纓被五章乘車
衣螭繡貴擬金與張此禍誰所為念之五內傷豎儒謬
乘障永賴天降康樅陽將解甲皖邑寢開疆耕夫緣南
畝士女各在桑念子中林士振策亦有行我聞三城美
龍嶺在其傍連林積修阻下有澄湖光明當洗甲兵從

子臥石牀

七哀

殷武誦采阻周魯歌東征聖哲則有然我何敢留行斬
牲祀好時釁鼓起前旌野布魚麗陣山鳴鏡吹聲函關
何用塞受降行已城路逢故鄉人取書寄東京寄言東
京友勉樹千載名一身未足惜妻子非無情

葛編修輓歌

景光

昔別情何樂今還語向誰幽房通貝闕空館罨蕪絲未

過徐公墓徒懷有道碑扁舟望湖曲清淚濕江蘿

凌孝女詩

王裒廢蓼莪女亦有凌娥哭魚奉慈母淒涼蔭女蘿幽
叢啼蕙露芳樹罷鶯歌迢遞城南路諸姑將謂何

賦得鉅野澤送宋顯夫僉事之南山

堤上柳沈沈春蒲泛渚禽濟田東匯闊汶水北流深落
日依中泚浮雲積太陰微茫看不盡渾似別時心

夜坐和成太常二首

片月生碣石微光挂玉弓
秋河空窅窅遙映建章宮
哀鴻知時節南飛正匆匆
感君思親咏惻惻此心中

牽牛表宮雉華星動綺錢
沈沈鵲觀悠悠清漏傳
無才愧三益虛食念百廛
綿思至中旦莫繼瑤華篇

送張有恒赴安慶郡經歷

曉路通高嶂春城入大江
草生垂釣浦人語讀書窓
肅客移茶鼎行田載酒缸
幕寮誰得似高步絕紛龐

宋祭酒輓歌二首

文章知有數者舊忽先零東井開圖畫西山闕爽靈司
徒虛執饋太史早垂銘悵望平原繡時時問客心

東閣哀長別南宮闕嗣音相知誰復舊為報果如今江
漢無時返奎文永夜深淒涼釣魚地落日下遙陰

謝堯章妻輓歌

草滿章臺墓松歌石柱廬憶歸司隸里能誦伏生書夜
哭聞茅店春祠雜筍道傷心夫與子塵簡若為舒

送李伯寔下第還江西

之子不得意南行無怨辭官河人杳杳客路雨絲絲古
木淮陰市春城孺子祠悽然千里別為賦小星詩

美浦江鄭氏義門

省風浦江許憑軾歷高門借問居幾何九世今不分解
驟青松林愛此季與昆檢身事先訓禮度尤恭溫生祥
亦何用有後天所敦常棣閔叔咸厲階悲婦言一朝或
因念喪敗寧具論清源無濁流芳蘭有競芬擣毫誦勿
替勉哉賢子孫

大口迎駕和觀應奉韻二首

晨光開翠嶠廣路淨炎氛玉馱度流水華蓋爛垂雲既
御大宛馬還朝鯤海君都人望旌纛樂哉歌采芹

仗出彈箏峽川原鼓騎分天行肅大化時邁耀前聞整
蹕傳清道激吹入行雲日暮望雙闕草木亦欣欣

送王開赴泗州行捕提舉

蒼茫吳楚會縱橫淮坂流春水未泮渚芳杜已生洲揚
旌朱樓前張獵青山幽獻功效大兕亦致公子裘逍遙

足為樂何嗟晚不侯

待制張廷美姑阿慶詩

葭莢啓望國灼灼詠桃夭
操觚染芳藻短髮未勝翹
始盼白雪句兼傳黃竹謠
蘭萌初映砌春霜已降霄
秋榛覆故隴驚蓬颯迴飈
金尊與瑤席庶足奉阿嬌

雲松樓

初日高樓上卷幔對黃山
黃山出霄漢爛漫發青蓮
參差非一狀朝夕看屢妍
九華承雙舄敬亭附駢筵
漫漫

雲卷嶺沈沈，松覆泉清飈。坐中起如聞，帝女絃靜有幽
事。樂動無塵慮，牽道遙悅心目。茲道可長年。

楊平章崇德樓

重城控秋塞，丹樓耀芳甸。頽霞上氛氲，蒼林下葱蒨。長
河城邊急，積岫窓中見。遠雁滅居延，行雲歸鄴善。大賢
謝卿相，垂幃化鄉縣。春蟲觸寶瑟，餘花飄玉斝。方從董
園樂，陋彼歌梁轉。伊予去山澤，寒齋秋草徧。載覽登樓
篇，益重臨淵羨。

八月十五日處州分司對月

玄武夕始正華月生秋旻金波何穆穆綠桂滿中輪徘徊出西陸照耀此甌閩光流河宿隱氣隨商律振餘輝動軒房紫蘭含微津皇天降嘉歲五政亦已陳樂哉一卮酒允矣同庶人

有所思

春風起寒色春衣方重熏新裝捲羅幕清唱入行雲艷色若流月芳澤謝蘭芬嬋娟信無度我思何在君

長安陌

浩浩長安陌，瓊樓夾廣屋。鴛鴦御溝上，芍藥吹樓前。駿馬追韓嫣，金尊約鄭虔。功名有時有，且得樂當年。

伯九德興學詩

上德撫玄運，籲俊尹神京。三雍烝髦士，五學訓齊氓。登歌陳羽縣，鸞刀奉麗牲。優游樂清化，大道嘉方行。

送孫教授

皇情重聲教，宵裝爾載馳。邊城南徼外，禮殿左江陲。揖

讓陳柳器弦歌蔭薛帷全勝宜春郭花落閉門時

賦得君子泉送彭公權為黃州教授

君子沒已久遺井郡齋中本寓思人意兼全澤物功銀
牀駁故蘚玉甃落寒桐幾日趨官舍橫經誦養蒙

賦得春雁送司執中江西憲幙

春風起蘋末旅雁尚回翔乳鴨嬌同唳新蒲短可藏應
懷洞庭水非避塞垣霜客路頻懷舊題書寄帝鄉

賦得蛾眉亭送王德常御史赴南臺

江亭望華嶠望望似脩眉掃黛偏能巧含顰知為誰娟
娟微雨裏脈脈夕陽時千里乘驄去因之傷別離

南歸偶書二首

帝城南下望江城此去鄉關半月程同向春風折楊柳
一般離別兩般情

二月不歸三月歸已將行篋換征衣殷勤未報家園樹
緩緩開花緩緩飛

別樊時中廉使

光祿橋西惜解攜
春星欲傍露盤低
自來宮柳多離思
更着城烏在上啼

題段吉甫助教別墅圖

玉署掛新圖如君
舊隱居峰高乃霞
上葉變是秋初游
客看常在溪聲聽
却無只此同登望
豈必命柴車

青陽集卷一

欽定四庫全書

集部

青陽集卷二

詳校官編修臣翟槐

中書臣劉源溥覆勘

總校官 知縣 臣繆琪

校對官待詔 臣胡士震

謄錄監生 臣錢敬熙

欽定四庫全書

青陽集卷二

序

送歸彦溫赴河西廉使序

元 余闕 撰

河西本匈奴昆耶休屠王之地三代之時不通於中國
漢始取而有之置五郡其間自李唐以來拓跋氏乃王
其地號為西夏至於遼宋日事戰伐故其民多武勇而

少文理然以予觀之予家合肥合肥之戍一軍皆夏人
人面多黎黑善騎射有長身至八九尺者其性大抵質
直而上義平居相與雖異姓如親姻凡有所得雖簞食
豆羹不以自私必召其朋友朋友之間有無相共有餘
即以與人無即以取諸人亦不少以屬意百斛之粟數
千百緡之錢可一語而致具也歲時往來以相勞問少
長相坐以齒不以爵獻壽拜舞上下之情怡然相讌醉
即相與道其鄉鄰親戚各相持涕泣以為常予初以為

此異鄉相親乃爾及以問夏人凡國中之俗莫不皆然其異姓之人乃如此則其親姻可知矣宜其民皆親上死長而以彈丸黑子之地抗二大國傳世五六百年而後亡非偶然也自數十年來吾夏人之居合肥者老者皆已亡少者皆已長其習日以異其俗日不同少貴長賤則少傲其長兄強弟弱則兄棄其弟臨小利害不翅毫髮則親戚相賊害如仇讐予猶疑江淮之士薄而人之生長於此者亦因以變及以問夏人凡國中之俗今

亦莫不皆然其於親姻如此則異姓之人可知也夫夏小國也際時分裂而用武必不能篤於所教而區區遐方教之亦未必合於先王之法及國家受天命一海內收其兵甲而摩以仁柔養之以學校而誘之以利祿今百餘年於茲絃誦之聲內自京師達於海徼其教亦云至矣而俗迺日降如此吾不知其何說也我祖宗之置肅政廉訪司於天下大要以風俗為先而其職以學校為重故世謂之風憲是得先王為治之意也故嘗選任

尊官非道德爵位出乎庶僚者不得與是選所以為民表也今皇帝用鬼名公為御史大夫公乃歷選朝著盡拔諸名臣為廉訪使而吾歸君彥溫以樞密院判官而為河西君少擢科目能古文辭有大節由國子博士五轉而遷是官今為廉使於夏必能興學施教以澤吾夏人吾夏人聞朝廷以儒臣為尊官以蒞已必能勸於學以服君之化風俗必當丕變以復於古其異姓相與如親姻如國初時如余所云者矣故道吾夏之俗以望吾

歸君馬

送月彥明經歷赴行都水監序

中國之水賴禹治之而悉平而河獨為患至今未已者何也河失禹之道而治河者不以禹之所治治之也蓋河出崑崙合諸戎之水東流以入中國其性勁悍若人性之有強力其來也甚遠而其注中國也為甚下又若建瓴水於峻宇之上則其所難治也固宜且中原之地平曠夷衍無洞庭彭蠡以為之滙故河嘗橫潰為患其

勢非多為之委以殺其流未可以力勝也故禹之治河自大伾而下則析為二渠大陸而下則播為九河然後其委多河之大有所瀉而其力有所分而患可平也此禹治河之道也自周定時河始南徙訖於漢而禹之故道失矣故西京時其受惠特甚雖以武帝之才乘文景富庶之業而一瓠子之微終不能塞而付之無可奈何而後已自瓠子再決而其流為屯氏諸河其後河入千乘而德棣之河又播為八漢人指以為太史馬頰河者

是其委多河之大有所瀉而力有所分大抵偶合於禹所治河者由是而訖東都至唐河不為患者千數百年或者以謂王景隄防之力乃大不然使無屯氏及德棣諸河河之大無所瀉而力無所分景以尋丈之防而捍猶螳螂之臂而可以捍大車之奔吾不信也惟河之委既多大有所瀉而力又有所分景之隄防特以捍漸水之衍溢者耳比趙宋時河又南決至於南渡乃由彭城合汴泗東南以入淮而漢之故道又失以河之大且力

惟一淮以為之委無以瀉而分之故今之河患與武帝無異余嘗以為中國之地西南高而東北下故水至中國而入海者一皆趨於東北古河自龍門即穿西山踵趾而入大陸地之最下者也然河天下之濁水也凡水一石率泥數斗嘗道出梁宋觀河所決凡水之所被比其去即穹居大木盡沒地中漫不見踪跡河之行於地也方數千年而河徙千乘自漢而後千數百年而河徙彭城然南方之地本高於北故河之南徙也難而其北

徙也易自宋南渡至今殆二百年而河旋北迺其勢然
非有他說也此者河北破金堤踰豐沛曹鄆諸郡大受
其害天子哀民之墊溺迺疏柳河欲引之南工不就又
遣平章政事鬼名公御史中丞李公及禮部尚書言哈布
哈公沈兩珪有郎及白馬而祀之河之患不已乃會諸
老臣集議治河者諸老臣無能言其說獨尚書台哈布哈
公以為當濬河棄道復引河以入彭城而待制楊梓又
力以為棄道不可濬設使濬之而河未必能入廟堂無

所從遣都水使者相其便害或者以為當築隄起曹南
訖嘉祥東西三百里以障河之北流則漸可圖以導之
使南廟堂從之迺置都水分監以任其事選朝臣之知
水者為都水而吾同年月君彥明為元幕將行以問於
余余不知河事者雖然諺有之曰不習為吏眠已成事
以事已成者為君言則古所以治河者可見也今河惟
不反故道則其勢可障而排之使南使反於故道由漢
之千乘以入海則國家將無水患千餘年如東都與唐

之時乎今禹之九河既不可復考而河亦不復德棣之
間漢人指以為太史馬頰河者尚未泯可尋究如縷河
之道是將大有所瀉而力有所分非若一淮之小而扼
其勢而使之橫潰為吾民害也今夫廟堂之議非以南
為壑也其慮以為河之北則會通之漕廢其係於朝廷
甚重余則以為河北而會通之漕不廢何也漕以汶而
不可以河也河北則汶自彭城以下必微微則吾有制
而相之亦可以舟以漕書所謂浮于汶達于河者是也

余特欲防鉅野而使河不妄行俟河復千乘然後相水之宜而脩治之特一人之私言也朝廷方事隄防固無事此適以彥明言者似迂遠而不切也萬一隄防不足以禦河則余之言或有時而驗焉故為之叙

送樊時中赴都水庸田使序

國家置都水庸田使於江南本以為民而賦稅為之後往年使者昧於本末之義民嘗以旱告率拒之不受而盡征其租入比又以水告復連繫告者而以為姦治之

其心以為官為都水而民有水旱之患如我何於是吳越之人咻然相譁以為厲已會天子問民所苦迺以為民實水非姦遂劾逐使者破械縱民而以聞上朝議乃歷選公卿有學術知大體者為之使而吾樊君時中以江南湖北道肅政廉訪使而選是職自君之來官僚協和吏畏民服政以大行命下之日無不相視嗟咨以惜其去獨其友余闕躍然曰東南民力自前已謂之竭矣况今三百餘年昔之盛者衰登者耗今其貧者力作以

苟生富者悉力以供賦有持其產為酒食予人人皆望
而去之其窮而無告甚於前世益遠矣其可重困之今
而得賢使者以蒞之修其溝澮相其作息不幸而有水
旱之災則哀矜而為之所民之窮者其少瘳矣乎今夫
木之實繁者其枝披其本疏者其幹拔况於國與民乎
哉故善樹木者簡其實而厚其本善為國者疏其賦而
厚其民理之較然者也時中慷慨有大志臨大事果毅
不擇利害而為之今其行也其能有以大慰吳越之民

望以副朝廷之倚注也必矣二月初吉式發鄂城卉木繁盛賓僚具在各為詩以稱美之予故首序焉

送范立中赴襄陽詩序

宋高宗南遷合肥遂為邊地守臣多以武人為之九十餘年間未嘗一歲無兵革故民之豪傑者皆去而為將校累功多至節制郡中衣冠之族惟范氏商氏葛氏三家而已三家之在當時貴不過通判顯者或至知縣與府族亦未甚大也皇元受命包襄兵革休養元元民既

富庶矣而又修禮樂定治具諸武臣之子弟無所用其能多伏匿而不出春秋月朔郡太守有事於學衣深衣戴烏角巾執籩豆壘爵唱贊道引者皆三家之子孫也故其材皆有所成就至學校官纍纍有焉當宋季時諸武臣之富貴眠三家蔑如也而百餘年之後惟儒家子入為弟子出為人師隨其才之大小皆有聞於時雖天道忌滿惡盈而儒者之澤深且遠從古然也范氏世多聞人立中允通敏由郡直學為襄陽教諭宋亡時蜀流

寓之士多在江漢意必有老成典型人也有老成典型人與之遊立中此行將大有得范氏之後有大顯者必立中也於其行也書以贈之

李克復總管赴贛州詩序

仁皇帝即位錄懷來功致高位者無慮數十百人獨韓國李公以甘盤之舊為最顯位平章總百度君臣一德銳精治古而韓公相業見稱於天下後世者設科取士其最也元統初余忝論薦計偕如京師與諸同年求韓

公子孫得令伯徵太常相往來又識克復屯田於京師
北來佐泗州而君復為泗州屯田提舉日與君處念天
下士所以復見前代賓興之盛者由韓公士不及見韓
公見屯田不其猶見韓公乎且與太常同年辱使納禮
故以太常之事君者事君朔月歲時必從諸僚友造君
第君暇亦輕裘緩帶以一小吏持馬過我我必為之傾
蓋而後去君色嚴而氣和有學而知體坐終日屹然於
先朝人物故實無不熟而知聽其言疊疊如環之無端

坐客無能置一辭也去年秋既書滿宰相以君有門閥且久更事非散地所宜處奏為贛州路總管州之長貳及諸屯田與九州之人往賀君闕在次舉璣拜君言曰仁皇帝之文德入人也深天下不忘仁皇帝必及於韓公朝廷錄勲舊家首言君斯文之興可俟矣請以為天下賀又曰韓公能以道術昌其家君兄弟能保功名以有光於韓公致中二千石請以賀君又言江之西文教之盛者曰吉曰贛多士彬彬馬人之所以屬於學科目

之興也於韓公之始而屬於學獨不於韓公之季以治
哉賴雖號難治君處之余知其為易也請以賀於是程
泗州賦詩四韻坐客人士皆為詩以道其行使書吾說
以為引

楊君顯民詩集序

我國初有金宋天下之人惟才是用之無所專主然用
儒者為居多也自至元以下始浸用吏雖執政大臣亦
以吏為之由是中州小民麤識字能治文書者得入臺

閣共筆劄累日積月皆可以致通顯而中州之士見用者遂浸寡况南方之地遠士多不能自至於京師其抱材蘊者又往往不屑為吏故其見用者尤寡也及其久也則南北之士亦自町畦以相訾甚若晉之與秦不可與同中國故夫南方之士微矣延祐中仁皇初設科目亦有所不屑而甘自沒溺於山林之間者不可勝道是可惜也夫士惟不得用於世則多致力於文字之間以為不朽而文辭者有幸有不幸者不幸者至於老而無所用

矣而其文又遂泯不顯是可哀也比年大江之南山林之士有挾其文藝遊上國而遇知於當世士之彈冠而起者相踵京師大官之家皆有其容而遇知於當世者亦比比有之若豫章楊顯民者抱其才蘊不屑於科目甘自沒溺於山林之間當士羣起而有遇之時而又終不肯一出以干時取譽是其中必有所負而然也予雖不識顯民然聞其人力學而操行通古今之務江南之士漸其澤而有名者甚衆其弟子之登科目仕州縣者

亦能以政稱其家固貧而年又將老迺日蕭然吟咏以自樂無少怨怒不平之氣其殆古有道之士耶余讀而愛之其弟子涂穎持其所謂水北小房集者來京師將刻之以傳於世余為題其首使後知顯民南州之士有所負者也是蓋有道之士也

貢泰父文集序

余天性素迂常力矯治之然終不能入繩墨矯治或甚則遂病不能勝因思以為迂者亦聖賢以為美德遂任

之一切從其所樂常行四方必迂者然後心愛之而與之合凡捷機變者雖強與之然心終不樂也故暫合而輒去京師馳逐聲譽之區也迂非所宜有嘗陰以求之士大夫之間得一人焉曰貢泰父泰父故學士仲章君之子能詩文少游太學有時名因自貴重不妄為進取有所不可交者亦不妄與交故吾二人者驩然相得若魚之泳於江獸之走於林也時泰父為應奉翰林文字固多暇者即與聚盞有蔬一品魚一盤飲酒三行或五

行即相與賦詩論文凡經史詞章古今上下治亂賢否
圖書彛器無不言者意少適即聯鑣過市據鞍談詭信
其所如而止及暮無所止則相與問曰將何之皆曰無
所之也乃各策馬還自古暨今王公貴人能求賢常少
然自至元初姦回執政乃大惡儒者因說當國者罷科
舉擯儒士其後公卿相師皆以為常然而小夫賤隸亦
皆以儒為嗤詆當是時士大夫有欲進取立功名者皆
強顏色昏旦往候於門媚說以妾婢始得尺寸此正迂

者之所不能為也。因翱翔自放，無所求於人。已而皆無所遇。予既歸淮南，秦父亦以親嫌辭官歸。除紹興，推官不相見者為最久。去年大原賀君為丞相，蒐羅天下人才，之有政譽者而秦父之治為浙東西第一，迺得復召為應奉。余適入朝，為待制，相見益歡，計其別十年矣。吾年少於秦父，鬚髮皆白，而秦父銳然面紅，白如常。出其別後所為詩文，甚富且大進，益知秦父真豪士也。夫以士之賢無所遇，而淹於下僚，宜其悲憤無聊而不能盡。

也顧乃自樹卓卓以其餘力而致勤於文學且其貌充然非其中有所負蓋不能爾然則吾秦父之迂又過我遠矣夫古之賢士多不兼於文藝文藝雖卑而世且貴而傳之者愛其人故也不賢者之於文藝雖極其精人猶將賤之亦何以為也秦父忠孝人也其功名事業當不待文與詩而傳而況於兼有之耶余昔與之別今見其文如此今又當別去計相見時其文又必有過此矣於其行也序而識之

送葛元哲序

文者物之成章者也。在天而為三辰，在地而為川岳，其在於人，若堯舜之治化，孔孟之道德，仲由之政，冉求之藝，一皆謂之文。今特以言辭之精為文者，夫言之精莫精於周公孔子二聖人之於言，豈有求其精而然哉？而其文何若是其蔚也？揚雄司馬相如韓子歐陽子始號為工於文者，彼其於周公孔子之文，非不欲窮日夜之力，極一世之所好，孜孜焉，追琢磨礪，以求其精而卒不

能至焉濂溪二程夫子之學其視揚雄司馬相如韓子歐陽子蓋有所不暇然味其言淵然而深雄然而厚粹然而醇使得列於聖門雖顏子曾子將不能過則夫言之精者又若不待窮日夜之力極一世之所好孜孜焉追琢磨礪以求至於聖人而後已此無他聖賢道德之光積中而發外故其言不期其精而自精譬猶天地之化雨露之潤物之魂魄以生葩華毛羽極人之智巧所不能為亦自然耳故學於聖人之道則得聖人之言學

於聖人之言則非惟不得其道并所謂言胥不能至矣
金谿萬元哲舊以文章名江南既擢第其文又傳於京
師衆謂元哲之文宜為天子粉飾太平鋪張鴻業以傳
於後世會有守宰之選遂以為興化錄事余知元哲終
以文選非久於外者也於其別也故與之論文

送許具瞻序

余讀周易之謙未嘗不掩卷而歎曰聖人待小人之心
一何如是其至也夫陽君子也陰小人也小人盛則干

君子故陰至三則履君子威亦未嘗不下小人故陽至
三則謙謙虛也陽本實而云虛者不自滿假故屈而下
於陰也是謙以下為德者也初而謙謙下而又下者也
二則浸以上矣故以鳴謙鳴者以言謙也三則益上而
位高故以勞謙勞者以功謙者也以功而謙厚之至也
厚之至而民馬有不服者乎故三之辭曰勞謙君子有
終謙而民既服君子之道終矣謙既終民既服進而之
四何施而不可聖人之心猶以為吾之待小人者未之

厚也又自反而撓謙故四之辭曰無不利撓謙其德已厚其謙已撓進而之五而小人者之終不可以化入也於是乎有侵伐之師故五之辭曰不富以其隣利用侵伐不富以鄰德之盛也利用侵伐順之至也聖人之待小人至是可謂盡心焉耳矣昔者禹征有苗苗民逆命益之贊禹惟在於謙禹遂有舜干之舉此其所謂撓謙也謙猶撓而未格則其侵伐者禹終得而已乎哉祖宗受命迅掃六合以有堯舜所未有之天下聖天子紹承

熙洽愛民猶子堯舜之仁不是過也頃者盜起海隅剽
民財犯官漕其罪可誅而區區赤子又恃一將校之力
所能舉迺不以為罪止於招諭盜又止我省臣以求降
此尤可誅也而亦從其請且曰德不下宣此吏之罪遂
盡變易瀕海之為宣慰及其郡縣之官選能當其任者
得三十八人親御便殿給符傳而諭遣之嗚呼此所謂
無不利撝謙而禹之所以待苗民者也三十八人之中
天台許君具瞻當治鄞具瞻余同年進士也其行端潔

其材勇以幹前知武義時攝金華縣事武義之民羣訴
憲府請還君金華之民亦羣訴於憲府留君不欲其去
其得民如此可謂稱茲選矣故余為道聖天子愛民之
深與夫所用具瞻者如此非惟勉具瞻亦以告夫民也

贈刑部掾史劉彥通使還京序

舒岸大江為城北走英潁南亘番歙西通黃蘄湘漢鄂
岳東距鳩巢所謂四通八達之地也自兵興所在從亂
舒介其間而獨徇義秉節不與之共戴天故羣盜環攻

之舒亦不少屈撓日治稍戢弓矢以與之相格鬪盜大至則男操兵婦給餉童子負瓦石空巷乘城與之決戰如是者今年其勞如此故其富者日貧而貧者日死以耗入其市廛里蕭然適其野榛莽没人不見行跡至其館簞簞不治餼牽不具委積不充使者之道此怒而去者往往有焉其以公事來者多眠賂以為喜愠喜為春溫愠為秋凜或怒而去則民相與踴躍曰禍其始此耳不甘食安處者累月而未寧逮無事迺已浚儀劉君

彥通為秋官掾亦以事來居郡浮圖每食蔬一器飯一
孟饋之珍羞則辭賣之財則艱然以怒持節至軍中勇
者執手以勉之創者涕泣以勞之其居此持久而民愛
之如始至惟恐其去已也傳曰有功而見之則說也君
重其民情而閔其勞民之說也亦其宜也臨川毛順孫
愛君尤至與士大夫賦詩以美之余故處合肥知君為
掾廉而有能以為士之美君者非譽也故序而冠諸其

首

高士方壺子歸信州序

堯舜之時以幽并為朔易元興舉堯舜未有之天下而一之而幽并始為土中以為四方之極然其地去荆揚數千里而氣苦寒而多風非其土著至則手輶而足裂其居處服食異用絺葛果茗魚鱗之物不能以易致皆性之所不便故南方之人其至者恒少非為名與利無從而至焉又况浮圖老子之徒以遺外世俗為道其於名與利蓋有所不屑故其至者尤少或至焉者則亦名

利之人也高士方壺子至正中至自信州余始遇之以
為名利之人也徐與往來見其氣泊然其貌充然人與
之談當世之事則俛而不答獨其性好畫人以禮求之
始為出其一二皆蕭散非世人所能及嘗為余言太行
者天下之脊而居庸古北者天下之岩險也其雄傑竒
麗非江南之所有天府之藏王公鉅人之所有皆古之
名畫余所願見者今皆見之而有以懽吾志充吾之所
操吾非若世俗者區區而至也余曰賢哉方壺其古所

謂善操枝者與夫輪扁之為斲知斲之為美不知有王
公之貴知斲之為得不知有晉楚之富故其為技也古
今之善斲者莫加焉今子幾於是矣其有不臻於古者
耶吾黨之學者苟遷於物其尚能望子耶於其行也相
率為詩以贈之

聚魁堂詩序

安慶郡文學秦宗德持其友人豫章嚴撰書來請曰去
年丙申江西行中書之鄉試也臨江貢士有曾魯者偕

其友廬陵解蒙高飛鳳劉倩玉俱就試寓止同舍往還
復同舟而載拆號四人者俱在甲乙選列捷報至高興
劉解乃留魯家鄉人因名曾氏之館曰聚魁堂云僕與
魯姻婭也復率大夫士之能文辭者賦詩美之謂宗德
常獲私於公書來請序願勿辭將以為榮焉余曰科目
取士吾嘗司文衡於中外矣退而攷其所得父子同榜
者有之兄弟聯名者有之師生俱在選者有之若同志
同升鮮有聞如曾魯者也其理似不偶然豈有數存其

間耶然不足泥也余惟愛魯之交友得人而人之與魯交能登科目發身也由此而升以行道以致君以澤民將無不可吾意四方者亦當彈冠相慶矣則親朋賦詩以志喜也固宜宗德曰斯言甚善請書以為序

送李宗秦序

淮東南西北道之地其民忠而能守國者三郡曰廬壽舒自盜興壽守先治戰備與民為守至輒敗然不能保其近地民無耕收而長淮之餉道又絕以致父子相食

而後潰廬大郡其南沮澤之地大而有名者三十六俗
名之曰圍地廣而足耕而守與將才下余嘗識之凡其
日之所營夜之所思非宴樂之事則培克之政也民有
持耒耜於門者則曰召使奪而辱之民飢以死城大而
不能守乃斂四境鄉兵以守之又無以食以賦富者大
都剽吏殺人而莫之禁至以其兵去之城遂陷余至舒
時國門之外數十里之地皆盜柵也幸戰而勝乃為攘
剔旁近之地令民耕之築壘以護其作役其不能耕者

時節與之繕城隍修矛戟而又明其政刑平其賦斂治其爭訟晷月而頗張今民之勇者無敢譁弱者無所悵如承平時然惟教民之術有未治耳方將與學士修其庠舍共講唐虞治道天人性命之說則禍亂有不足定者若姑孰李宗秦志學而行端又吾所當延而禮之者也而力不足宗秦族人陷在姑孰者聞多自拔於宣將往來之又義之所不敢止者姑序吾懷而與之別

藏乘法疏後序

天下之書博者未嘗無要法五聲十二管可以盡天下之音聲十干十二支可以盡天下之甲子象形指事轉註諧聲會意假借可以盡天下之文字其統之有宗其會之有元充之而不窮合之而不遺知者創物其有功於世類如此佛氏有法疏書會萃名義而藏十二部之理無不在誠要法也西菴遂公罷講遊方二十年歸乃取而修訂之補其所未備白其所未明去其所未安明性相析機宜判定名體目曰藏乘法疏濡須有道之士

文公無學以衣資若干貫刻之板以惠四方昔邵子皇極經世以元會運世衍為十二萬九千六百年以盡事物無窮之變其文博其義富蔡西山撮其機括為指要一編其有功於邵子大矣遂公之書是亦大藏之指要與余讀傳燈婆子請趙州轉經繞禪床一布云轉經已婆云只轉得半藏半藏全藏姑置勿問五千四十八卷一周行頃何為而轉之此又西菴不傳之妙因書之卷末在學者所自得

草書
草書

青陽集卷二

欽定四庫全書

集部

青陽集卷三

四

詳校官編修臣翟槐

中書臣劉源溥覆勘

總校官進士臣繆琪

校對官中書臣李斯咏

謄錄監生臣王鍾岱

欽定四庫全書

青陽集卷三

元 余闕 撰

記

含章亭記

坤者天下之至文而世謂坤為含章者美而含之六三
之事非盡坤之道也嘗觀於地山川之流峙至文也風
霆之流形至文也鳥獸草木之彙生至文也故夫子贊

之以為光大又以為化光又以為美在其中暢於四肢
天下之文孰加焉而三獨含章何謂也夫乾尊道也坤
卑道也故乾主於五而坤主於二若三四者爻之無位
者也乾之四近於尊故曰或躍或可以進也坤之三近
乎卑故曰含章可貞可晦而可用也夫子釋含章可貞
以為以時發者相時而動之意故曰可者僅詞也若四
近於尊而括囊矣上擬於尊則龍戰矣是故龍君象也
若六五者可謂至尊而非據矣自非中德何以能吉故

曰黃裳黃中之色裳下之服夫惟有是中德故不失其體也無棣徐君子謙博古而通今自監察御史郎官署為諸道肅政廉訪使者政理蔚然俱可謂之文矣惟坤之六二可以當之非六三之事而其名亭謂之含章者人不知其所云也余與君處江夏凡期年知君之為人沖然賢者也曾子稱顏子以為以能問於不能以多問於寡有若無實若虛君嘗慕而師之羣居相與不言不知其有蘊也然則君所謂含章者其必以此豈世所謂

斷章取義者歟君曰子之言然雖然子論含章先儒所云請求諸通經者而質之

穰縣學記

學校之教聖人所以盡人性者也夫人之性天命也天命者諸生編予者也其理仁義禮智其器君臣父子夫婦長幼朋友其文昏喪冠祭朝覲會同射飲軍蒐此性之體然也若夫忠信也而流為殘賊禮讓也而流為爭奪文理也而流為淫慝此性之失而非其本然者也聖

人人之慕隆也是故為之學校之教師法之化禮義之道所以正人心而定天命也而世儒之言有曰殘賊爭奪淫慝者性也必賴聖人為之教然後忠信禮讓文理興而生人之道立是不知性者之言也今夫鳥之鷩也飛而逐其雌獸之生也走而軼其羣然止於飛走而已也惟人之性具天命者是故充其知可以通晝夜之道而知死生之說推其才可以參天地而贊化育何也所性而有故也今曰性無善也必聖人為之教而後善

則毆鳥獸以由于學校之教師法之化禮義之道亦可
以為忠信禮讓之理也其可乎是故栝棧棟宇聖人所
以盡木之性也引重致遠聖人所以盡馬牛之性也學
校之教師法之化禮義之道聖人所以盡人之性也其
教已立其化以行其道以成之後於是忠信立而殘賊
息禮讓著而爭奪寡文理明而淫慝平其動之也神其
漸之也深則夫民之心可與為善可與為惡可與為治
可與為亂夫豈奪之以惡而與之以善易之以亂而誘

之以治使其民至於如是哉亦盡其性而已矣有弗若
於吾化弗迪於吾道者然後為之刑政以齊之則刑政
者先王所以輔治而未嘗以為先也是故教成而王政
成而霸威無焉而亡其道有大小而其教有淺深如此
自先王之迹息而天下之治皆苟且由其知治而不知
教而其甚者遂至亂亡相尋終莫能勝民之焚焚者皆
不考乎此大元之興百有餘年列聖丕承日務興學以
為教黨庠塾序徧於中國雖成周之盛將不是過夫穰

大縣也自入職方以距于今吏猶未能為民立學蒙古
伊魯布哈君來監縣乃曰學校之教先王為治本也遂
出其田祿以為民倡民歡樂之乃買地於州治之西攻
其正位肖孔子及顏子以下十四人之像於殿餘七十
二子以及諸儒之從祀者悉繪之於兩序後為學舍廩
厝以安居其師弟子前闢門道屬於大衢立表而題其
上曰穰縣之學學甫成會天子以學校考吏課君方樂
有學校教民也而乃以憂去其同年友成君遵寔家於

穰入朝為禮部郎中言君所以待穰之民甚厚而篤於教思如此故既去而民至今思之而恐後之未知所以教而民未知所以學也為予誦其所聞以告之君操行廉白為政以愛民為本日常惻惻然若已傷之是可謂良有司也况予於君亦同年也故為記之

湘陰州鎮湘橋記

湘水出零陵北至湘陰入洞庭而湘陰諸山谷之水則會於城南為東湖以入湘方春夏時水潦降而洞庭漲

則湘水不能入湖因以淤漫為大浸州為湖南北孔道
凡行者之陸出與夫鄉民之有事於州者每涉湖則有
風濤之虞否則又為舟人還阻之患宋之時州有鄧氏
媪率其田人作大堤絕湖以屬之州為二木橋以醜湖
水行者德之謂之鄧婆橋當德祐末橋毀官為復之至
大德中旋敝州人黃仲規乃以私財命其子惟敬率眾
為石橋南北棟石為崖中繫石為高柱布木面石其上
為屋九楹覆之以與民為屢易其名曰鎮湘橋歷四十

餘年至元初覆木又啟屋且壞惟敬之弟惟賢惟德德發其帑得錢萬貫以告州人將卒其先之功州人樂為相之又得錢二萬五千貫乃撤覆木施石梁更作大屋中為道左右為市肆橋廣若干尺袤若干尺上可以任大車下可以通千斛舟飾以綵繪遠而望之爛若陰虹之飲湖中行者之遠來與州人之市於此者若由康莊而履堂奧不知其有湖之阻也夫水天下之至險聖人為之舟楫以濟民而舟楫需人之力人之力有限而涉

者之無窮也不須人而能濟有無窮之利者惟橋為然
夫橋之利大故其費亦大非若一舟楫之可易具非有
司與大家之力則不能為黃氏非有大作業大廩藏而
為有司大家之事力有不足至父子相承乃克成此夫
亦難能也惟德之子天禧有才藻通經術屢領鄉薦余
校藝鄂渚時得其文以置前列其擢第也將亦易然黃
氏有子如此必多益於人如是橋類也故為記之

漢陽府大成樂記

禮樂出於天而備於人卑高以陳者禮也網緼而化者
樂也故禮者天地之大節樂者天地之大和其體極乎
天蟠乎地其用行乎陰陽而通乎鬼神夫人者天地陰
陽鬼神之會而禮樂者觀會通以行其道也其君臣上
下賓主之有其文升降揖讓綴兆清濁之有其度禮以
著節樂以為和節以別同和以合異是皆天之所畀而
非人之所為也然心天命也欲心生也欲熾而無以治
之則心枯亡矣禮樂者先王用之以迪民心而定天命

者也是故朝覲會同禮樂以接郊社廟享禮樂以成軍旅賓客禮樂以治用之於天神格用之於人鬼享用之於民而民事治故習俗美而侵侮蕩淫之心無自而生天下之大政豈有出於此者哉洪荒之道邈矣堯舜以還歷夏商周禮樂始備而天下稱為極治成康之後浸以就弛至春秋而壞爛極矣漢之時禮雖麤具於經而亡散者亦已甚樂之道蕩然雅頌所存特其文而已耳是故其禮失者其俗汙其樂濫者其教衰天下之治所

以不及於三代者禮樂不足之故也皇元之興諸事未
遑即定著孔子廟祀之禮既又今天下廟祀用大成樂
令雖具而吏亦鮮能應詔制春秋奠薦類以鼓吹行事
夫禮樂者以之習民使之飽聞而飫見之然後入人深
而成功大孔子廟者鄉大夫屬民敷教之地而民幸有
禮可以畧見先王之道而樂又不備由吏之為政不知
本末與所先後也如此漢陽府孔子廟祀舊亦循用俗
樂河東譚君知府事乃率其同寅相與出俸金作雅樂

器教授余時獻以其事來請宰臣是之為遣一封傳作
之平江數月而樂至為琴瑟笙笛塤篪各二特鐘特磬
祝敔鞀鼓各一簫八編鐘磬各十六擇諸生肄習之八
月丁丑有事於學宮人聲在上樂奏在下翕如純如疾
舒以度禮儀既舉觀者咸作而歎曰禮樂之用大矣若
夫子監於四代樂取韶舞其治所先在放鄭聲欽若異
教以迪民性夫禮樂之存有如籩羊薦于明靈永永是
享於是州之士相與樂譚君之政而喜民復見先王之

樂也咸願刻石樹之廟廷余為之書而使歸刻焉

新修大寧宮記

華西神川原大寧宮者華人以為古后土之祠也宮故
並嶽祠宋真宗幸華山賜今額以華山道士武元亨主
之其後元亨以祠隘請於朝改作之於神川之上宮初
甚侈大至靖康時兵燬里中人嘗修復之然庠隘不能
如舊觀金正大中乃加增拓下距於今二百有餘年故
屋皆壞無能修葺之者里人張某欲以私力加繕治之

未及為而歿其子某乃追成先志以錢二萬五千貫具材木飭覽會工藝自門至寢為屋若干楹凡期月而成左氏曰共工氏之子曰勾龍能平水土為后土之官故祀以為后土盧植諸儒從之遂以為后土勾龍也蔡邕則曰勾龍社神也堯祠之稷之神柱與棄也漢后土祠在國士地社稷之位在未地為王肅之說者又曰社與稷皆土神但生育之功異故有二名耳史記武帝初郊雍太史祠官言當祀后土於方澤立為五壇壇一黃犢

太牢具天子從之乃東立后土祠於汾陰雒上親望拜
之如郊則漢以下地祇有社又有后土后土之說紛紛
莫能統一以余考之皆失也鄭司農曰后土社神也蓋
社以地言后土以神言社之有后土猶郊之有上帝也
曰帝曰后皆能宰之稱天子之社神曰后土諸侯而下
之社神亦曰后土者猶郊之神曰上帝而五方主氣者
亦謂之帝不以嫌也五土之神吐生萬物而稷者五穀
之長也人非土不生非穀不養是以先王尊而祀之句

龍有功於水土柱與橐有功於稼穡故以配食其神曰
祀勾龍以為后土者猶所謂禘嘗而郊稷是也又周禮
以血祭祭社稷五嶽其以血祭則非人鬼且其祀先五
嶽則不得為勾龍亦明也古之制天子祭天地諸侯祭
山川大夫祭五祀位有貴賤故祀有大小而后土之祀
自天子達於庶人所以生者一也王者為羣姓立社曰
大社自立社曰王社諸侯為百姓立社曰國社自立社
曰侯社大夫以下成羣立社曰置社大社國社為民祈

報也王社侯社自為祈報也大夫以下無民人莫為立社又不得自立社故與民族居百姓之上乃立社以祈報之今國都至於郡縣皆有社獨置社亡耳民春秋雖有社祭然無壇壝主位牲齊儀章皆不應於禮其踵事而生者益甚莫為之禁夫不祀其所得祀非義也祀其所不得祀非禮也后土者民之所得祀者也今雖不能應於禮能修而祀之其賢於失禮而犯義者也余之同年光祿主事虎理翰君家於華義張氏之斯舉也而屬

記於余馬

梯雲莊記

晉地土厚而氣深田凡一歲三藝而三熟少施以糞力
恒可以不竭引汾水而溉歲可以無旱其地之上者畝
可以食十人民又勤生力業當耕之時虛里無閒人野
樹禾牆下樹桑庭有隙地即以樹菜茹麻棗無尺寸廢
者故其民皆足於衣食無甚貧乏家皆安於田里無外
慕之好間有豪傑欲出而任由他岐皆可以得官爵故

其為俗特不尚儒周行郡邑之間環數百里數百家之聚無有一人儒衣冠者獨楊黃許氏以儒稱於鄉三時力田一時為學褒衣博帶出入里巷之間其族數十家化之皆教於禮每歲時上塚族人各具酒饌羣至墓下推長者一人主祀以次奠薦既竣長者坐少者以序羅拜之然後皆坐相與行獻酬之禮子弟有為小不善者則長者進而誚讓之衆皆進曰長者言然請改是乃已至於再至於三而終不能改也則衆相與擯絀之不與

同祭祀如是者已三世矣嘗詢其族人許氏之祖有義甫君者攻詞賦有聲於時其弟恒甫君治經義通周易號松谿先生然皆隱不仕恒甫之仲子克敬始以教官歷太常奉禮翰林國史院編修官而孫寅字可賓與余同登元統元年進士第擢翰林國史院檢閱官中書掾中書照磨名聲益顯楊黃之許遂為其鄉著姓郡守為表其邑中之居曰梯雲坊其後河東僉憲楊君士傑行郡至是曰楊黃者可賓之所生長其田廬丘墓皆在如

是又命有司易其莊為今名以風厲其鄉人使知儒之為可貴也夫儒之所以為可貴以先王之道之所在也是以古者少使居學老使居塾不如是者不列於王官不可以長民故時不貴儒而儒貴後世之用人不必盡出於儒者也則民何由知其可貴而貴之比年朝廷設科以待天下之士民始稍稍知所趨向獨晉俗堅強不輕而變今賢使者殊其宅里明其貴賤示其好惡其意豈為許氏計哉昔常衮為福建觀察禮貌其士俗以不

變而況上有用儒之君下有風厲之使吾見晉之人父
詔其子兄訓其弟其必相謂曰弗若許氏不可以同祀
弗若可賓不得以為秀民耒耜以業詩書以語民之彬
彬將若鄒魯矣然余嘗聞之民可以身化難以利誘可
賓為人侃侃篤於孝誼有位於朝行顯貴矣乃以親老
棄其官而養人皆賢之以賢者而化民如草尚之以風
也其有不從者乎故余為記其表閭之始且以觀其成

焉

合肥修城記

至正十一年寇起淮南自浙西江東西湖南北以及閩蜀之地凡城所不完者皆陷合肥之城久圯且夷倉卒為木柵以守柵成賊大至民賴柵以完其後僉憲馬君至顧而曰以柵完民幸也非所以固迺白皇孫宣讓王及其憲使高昌公議修其城遂發公私錢十萬貫召富人為之為千夫長百夫長者傭小民相故所圯夷盡築之富人得官發錢無甚費咸喜助所不足小民方饑得傭

錢奔來執事鼙鼓不設鞭扑不施捧柴荷畚屬至競作
自十三年二月朔戒事九月畢城四千七百有六尺六
門環為睥睨設周廬廬具飾器門皆起樓櫓相盜所必
攻者覺之計用木若干覺四百四十八萬用人之力七
十七萬八千城成而盜不至者今期月矣余生長合肥
知其俗之美與夫所不從亂而可與守者有三焉其民
質直而無二心其俗勤生而無外慕之好其材强悍而
無孱弱可乘之氣當王師之取江南所至諸郡望風降

附獨合泚終始為其主守至國亡乃出降天下既定南
人爭出仕而少不達則怨議其上而不可止吾合泚之
民布衣蔬食秀者治詩書朴者服農賈昏喪社飲合坐數
百人無一顯者無愠怒不平之色驅牛秉耒雞鳴而耕
朝而息日出而耕莫而息不合耦而終十畝負二石之
米日中趨百里而無德容惟其質直而無二心故盜不
能欺勤生而無外慕之好故利不能誘強悍而無孱弱
可乘之氣故兵不能誅昔者木柵猶足以力戰禦寇而

無肯失身於不義者今而得賢使君修其垣墉救其疾
苦攜持撫摩以與民守之而民之與君又歌舞愛戴與
君守如子弟之於父兄手足之與頭目然自今至於後
日是惟無盜有亦不足憂也君前為庸田僉事城姑蘇
今憲淮南又城合肥一人之身而二郡之民賴之以有
無窮之固儒者之利不其博哉君名世德字元臣雅爾
喀斡國人由進士第歷官應舉翰林文字樞密都事中
書檢校庸田僉事為今官與余前後為史氏城又余之

所志而未成者也義為紀之其敷事與凡供役之人則
載之碑陰

大節堂記

皇帝御天下之十五年念君德之不宣民生之未遂乃
詔丞相更守令之法著考課之令歷東朝臣以為郡縣
親御便殿賜之酒而諭遣之於是天下之吏人人奮厲
以治所謂六事者以成功名稱上意宗正郎中韓君建
之守安慶也獨鮮有所事其政清淨而已在官三年頴

六之盜起所在奇衰之民羣起從之殺守令據城邑時天下久平民生長不識兵革而郡縣無城廓無兵備卒然有變吏往往盜未至先去而城陷有不去者盜至而民不與之守城亦陷明年十一月盜入宿松破太湖潛山吏多徙家江中為去計君獨無所徙而治城隍計軍實以示民必守不去越明年春盜入桐城以桐人來攻城君縱民出擊之盜敗去自二月至於九月盜之來攻者十有一大小百餘戰皆敗之盜大忿乃悉衆而東舳

艦數百里鉦鼓之聲動天地王師敗績小孤山十月癸卯盜逐北至城下城南郭久隳為民居而聯羣艦為城盜縱火舟燒聯艦潰火入南門燒民居諸守將亦潰民恐甚走來眠君君方部署寮吏為戰守如恒日民乃無恐且戰且撲火甲辰盜傳西郭戰却之明日傳東郭又戰却之相火所經撤民屋材夜柵之旦具甲寅盜力攻無所得利諸潰者聞城完且相率來援盜望見之乃夜引去余來戍郡道聞城陷矣比至乃完問故父老皆

曰韓君完我君時亦去則民無與為守民無與為守則城之完不完蓋未可知矣方朝廷更化時吏皆黷藻其政以角一日之能君若無能然者及臨大變其所能者乃若人之所未易能君誠不可以小知也予觀於今南方之國不頻於盜非其所力攻有能守者矣而頻於盜者為難頻於盜徼幸於一勝有能守者矣而屢勝者為難民屢勝矣至於敗且危於是不去而上効死以保其下下効死以衛其上卒能因敗為功以危為安如君之

為者蓋千百之十一此人之所難能也曾子所謂臨大節而不可奪者君其人歟郡所治屬縣六西至於懷寧又西至於潛山又西至於太湖武夫義民列若相望百戰抗盜賴君以為根本而無叛意東至於池又東至於姑孰數郡之民賴君以為藩屏而無死傷之禍君之所完不既大矣哉余抵郡十日盜復大至與君率眾殲之盜不至者今再暮矣十四年春三月朝廷錄十月功特加君中奉大夫秩從二品幙官以下各升秩有差余因

名其廳事曰大節之堂所以揚君之懿於無窮也雖然
治之亂猶旦之有夜也後之人坐其堂而思其人思其
人而懼其時有不協於其行不完於其民者獨不欲然
於君者乎余之名堂又所以勸於無窮也時與君守者
達嚕噶齊西夏阿爾長普照磨楊恒錄事司達嚕噶齊
摩哩齊錄事黃圖倫台錄判燮理桀錫權懷寧縣達嚕
噶齊約蕪圖安慶萬戶府經歷郝瑞千戶李思禮邵永
堅王國英許元琰賈伯英額森特穆爾魯沁耀珠洪保

張彬路忠金嗣元葛延齡百戶盧顯宗邵文質韋與權
齊世英宗達周文謝茂陳士達楊買兒朱傑李玉祝
茂夏興侯興祖呂重祿朱臣孫朱惠龍彈壓嚴繼祖伍
子雲張宏晁關保揚州弩軍翼千戶賈禧百戶王孫兒
伯勒齊爾布哈沁海翼百戶毛偉牽連書之使與有聞於
不朽君字公懋遼西人

憲使董公均役記

古者井天下之田以授民民百畝易者倍之再易者再

倍之其養均也則九壤程九貢市廛二十而一近郊十
一遠郊二十而三甸稍縣都皆十二其取之又均也小
任以力則上地家三人中地二家五人下地家二人大
任以兵則比為五閭為兩族為卒鄙為旅州為師鄉為
軍其役之又均也之二者王政之大端也大端具而又
為之刑政以防民情為之學校以道民性為之公卿大
夫士以登民材其制詳故不亂其本深故不拔是以商
周之世皆七八百年而後衰也自經界廢於是田不在

公而養不均矣養不均則土會民數皆不可知而賦與役不均矣養與賦與役之不均雖周公為政不可以言治也浙東古於越之地也其地之民無甚貧甚富之家山谷之間有一畝之居十畝之田者祖孫相保至累世不失又其土瘠故其小人勤身而飭力其君子尚樸儉而敦詩書非若吳人之兼并武斷大家收穀歲至數百萬斛而小民皆無蓋藏此固易治之地有賢師帥為之制而道利之其亦可以庶幾矣乎然余嘗行郡以觀民風

其庶人之役於官者往往閭左之民也而富人則有田而不役甚者或不以征歲終保正稱貸而輸之至破產者無算此其田雖近於均而役則不均也至正十年秋藁城董公來長越憲省民所疾苦乃曰井田者吾雖不得而行而役不可不均於是擇其部吏之精强者委之以事以衢州路經歷王仲謙西安縣主簿張拜珠治金華青田縣尹葉巴延治武義永嘉縣丞林彬祖治永康而蘭溪州達嚕嚕齊齊哩克齊義烏縣達嚕嚕齊額琳沁

浦江縣達嚕嚕齊羅阿李巴哈東陽縣丞蔣受益自治其邑義烏縣則復以衢州路錄事范公琇為之輔而總管陳巴延布哈總領之先期一月令民及浮圖道士各以田自占其或蔽匿及占不以實者沒其田令既決乃保以一正屬民履畝而書之具其田形疆畝主名甲乙比次以上官官按故牘而加詳覈之曰魚鱗冊以會田別為右契予民使藏之曰易由以主業其征之所會曰鼠尾冊以詔役弓兵隸卒鋪兵為至勞坊里正主首次

之館夫步夫又次之凡民田多者役其勞少者役其逸又其少而不足役者則出錢以助奇田不助者則以待夫不虞之役其一人而有數保之田者各役之即賣其田則買者承其役凡一州六縣之田二萬六千四百二十四頃四十九畝役者一萬二千六百六十八名故役而今復者四千三百名所未役而今役者三千四百六十名役而不復者休而始役之冊成一留縣一藏府一上憲司於是野無倖民公無逸征強弱有倫賦役有經

上下和洽歲以有年蓋公之遇人有禮故吏盡其力其
使民有義故貧者戴其德而樂其復富者服其公而忘
其勞以故為是大制政不肅而成民不擾而治也傳曰
天地養萬物聖人養賢以及萬民公之是舉兼禮與義
則誠賢者矣繼今之人毋替公政或推其所未及則越
之民樂樂利利其福豈可既哉故於終事也其下咸願
刻石以示不朽以闕嘗陪其末議而知其梗槩遂來屬
筆焉至正辛卯十二月記

青陽集卷三